

四庫全書

子部

欽定四庫全書

子部

六藝之一錄卷一百十七

詳校官中書_臣陸 湘

貢外郎_臣牛稔文覆勘

總校官檢討_臣何思鈞

校對官編修_臣吳壽昌

謄錄監生_臣王志遠

欽定四庫全書

六藝之一錄卷一百十七

錢塘倪濤撰

石刻文字九十三

金薤琳琅

孔子廟堂碑

太子中舍人行著作郎臣虞世南奉勅撰并書

司徒并州牧太子左千缺率兼檢校安北大都護相

王旦書

微臣屬書東觀預聞前史若乃知幾其神惟睿作聖玄

妙之境希夷不測然則三五迭興典墳斯著神缺聖跡

可得言焉自肇立書契初分文象委裘垂拱之風革夏

翦

缺

質文殊致進讓罕同靡不拜洛觀河膺

符受命名居域中之大手握天下之圖象雷電缺威

刑法陽春而流惠澤然後化漸八方令行四海未有偃

息鄉

缺

預帝王之錄遠跡缺史之儔而德

侔覆載明兼日月道藝微而復顯禮樂弛而更張窮理

盡性光前絕後垂範百王遺風於萬代猗歟偉歟若斯
之盛者夫子膺執之精踵千年之聖固天縱以挺質
稟生德而降靈載誕空桑自標河海之狀纔勝縫掖克
秀堯禹之姿知微知彰可久可大為而不宰合天道於
無言感而遂通顯至仁於藏用祖述先聖憲章往哲夫
其道也固以孕育陶鈞包含造化豈直席卷八代并吞
九丘而已哉雖亞聖鄰幾之智仰之而彌遠亡吳霸越
之辨談之而不及于時天厯浸微地維將絕周室大壞

魯道日哀永歎時艱實思濡足遂迺降迹中都俯臨司
寇道超三代止乎季孟之間羞論五伯終從大夫之後
固知栖遑弗已志在於求仁危遜從時義存於拯溺方
且重反淳風一匡末運是以載贄以適諸侯懷寶而遊
列國玄覽不極應物如響辨飛龜於石函驗集隼於金
櫝觸舟既曉專車能對識罔象之在川明商羊之興雨
知來藏往一以貫之但否泰有期達人所以知命卷舒
惟道明哲所以周身牖里幽憂方顯姬文之德夏臺羈

紕弗累商王之武陳蔡為幸斯之謂歟於是自衛反魯
刪書定樂贊易道以測精微修春秋以正褒貶故能使
紫微降光丹書表瑞濟濟焉洋洋焉充宇宙而洽幽明
動風雲而潤江海斯皆紀乎竹素懸諸日月既而仁獸
非時鳴鳥弗至哲人云逝峻嶽已隕尚使泗水却流波
瀾不息魯堂餘響絲竹猶傳非夫體道窮神至靈知化
其孰能與於此乎自時厥後遺芳無絕法被區中道濟
天下及金冊斯誤玉弩載驚孔教已焚秦宗亦墜漢之

元始永言前烈褒成爰建用光祀典魏之黃初式遵故
訓宗聖疏爵允輯舊章金行水德亦存斯義而晦明匪
一屯亨遯有筐筥頻繁與時升降靈宇虛廟隨道廢興
炎精失御蜂飛蜩起羽檄交馳經籍道息屋壁無藏書
之所階基絕函丈之容五禮六樂剪焉煨燼重弘至教
允屬聖期大唐運膺九五基超七百赫矣王猷蒸哉景
命鴻名盛烈無得稱焉皇帝欽明睿哲叅天兩地迺聖
迺神允文允武經綸云始時惟龍戰爰整戎衣用扶興

缺
神謀不測妙算無遺弘濟艱難平壹區宇納蒼生於
仁壽致君道於堯舜職兼三相位總六戎玄珪乘石之
尊朱戶渠門之錫禮優往代事踰恒典於是在三昧命
缺

充隆帝道丕承鴻業明玉鏡以式九圍席蘿
圖而御六辨寅奉上玄肅恭清廟宵衣旻食視膳之禮
無方一日萬幾問安之誠彌篤孝治要道於斯為大故
能使地平天成風淳俗厚日月所照無思不服憬缺獫
戎為患自古周道再興僅得中算漢圖方遂纔聞下策

徒勤六月之戰侵軼無厭空盡貳師之兵憑陵滋甚皇
威所被犂興睭納空山盡漠歸命關廷充牣葉街填委
外殿開闢已來未之有也靈臺偃伯玉闕虛侯江海無
波烽燧息警非煙浮漢榮光幕河楷矢東歸白環西入
猶且兢懷

缺

馭朽納隍卑宮菲食輕徭薄賦斷珣反

樸抵壁藏金革舄垂風綈衣表化歷選列辟旁求邃古
克已思治曾何等級於是眇屬聖謨凝心大道以為括
羽成器必在膠雍道德潤身皆資學校矧迺入升妙義

析理微言厲以四科明其七教懿德高風垂缺斯遠而

棟宇弗修宗祧莫嗣用紆聽覽爰發絲綸武德九年十

二月廿九日有詔立隋故紹侯孔嗣哲子德倫為褒聖

侯乃命經營惟新舊趾萬雉斯建百堵皆興揆日占星

式規大壯鳳甍騫其特起龍桷儼以臨空霞入綺寮日

暉丹檻窅窅崇邃悠悠虛白缺寫狀妙絕人功象設

已陳肅焉如在握文履度復見儀形鳳跼龍蹲猶臨咫尺

莞爾微笑若聽武城之弦怡然動色似聞簫韶之響

襜褕盛服既覩仲由侃侃禮容仍觀衛賜不疾而速神
其何遠至於仲春令序時和景淑皎潔璧池圓流若鏡
青蔥槐市總翠成帷清滌玄酒致祭於茲日合武釋菜
無絕於終古皇上以幾覽餘暇遍該羣籍乃製金鏡述
一篇永垂鑒戒極聖人之用心弘大訓之徵旨妙道天
文煥乎畢備副君膺上嗣之尊體元良之德降情儒術
遊心經藝楚詩盛於六義沛易明於九師多士伏膺名
儒接武四海之內靡然成俗懷經鼓篋攝齋趨奧並鏡

雲披俱餐泉涌素絲既染白玉已彫資覆簣以成山導
涓流而為海大矣哉然後知達學之為貴而弘道之由
人也國子祭酒楊師道等偃玄風於聖世聞至道於先
師仰彼高山願宣盛德昔者楚國先賢尚傳風範荊州
文學猶鐫歌頌况帝京赤縣之中天街黃道之側聿興
壯觀用崇明祀宣文教於六學闡皇風於千載安可不
贊述徽猷被之雕篆乃抗表陳奏請勒貞碑爰命庸虛
式揚茂實敢陳舞詠乃作銘曰

景緯垂象川岳成形挺生聖德實稟英靈神凝秀氣月
角珠庭探賾索隱窮幾洞冥述作爰備丘墳咸紀表正
十倫章明四始繫纘義易書因魯史懿此素王邈焉高
軌三川削弱六國從衡鵷首兵利龍文鼎輕天垂伏鼈
海躍長鯨解紱去佩書燼儒坑纂堯中葉追尊大聖乃
建褒成膺茲顯命當塗創業亦崇師敬胙土錫圭禮容
斯盛有晉崩離維傾柱折禮亡樂廢風頽雅缺戎夏交
馳星分地裂蘋藻莫莫山河已絕隋風不競龜玉淪亡

樽俎弗習干戈載揚露閣里麥秀鄒鄉修文繼絕期
之會昌大唐撫運率由王道赫赫玄功茫茫天造奄有
神器光臨大寶比蹤連陸追風炎昊於鑠元后膺圖撥
亂天地合德人神攸贊麟鳳為寶光華在旦繼聖崇儒
載修輪奐義堂弘敞經緯紆縈重樂霧宿洞戶風清雲
開春牖日隱南榮鏗聒鍾律蠲潔齋明容範既備德音
無斃肅肅升堂兢兢讓席獵纓訪道橫經請益帝德儒
風共宣金石

推誠奉義翊戴功臣永興軍節度管内觀察處
置等使特進檢校太師兼中書令行京兆尹上
柱國琅邪郡開國公食邑四千五百戶食實封
一千三百戶王彥超再建

安祚刻字

唐姜嫄公劉新廟碑

太中大夫行中書舍人上輕車都尉賜紫金魚袋高

郢撰

節度巡官將仕郎試大理評事張誼書

姜嫫者炎帝之後有邠氏之女姓姜字嫫帝嚳之元妃
后稷之母也公劉者后稷之曾孫周文王之十代祖也
姜嫫嘗出遊見巨跡而履之載震載夙時維后稷以居
然生子必所不康初寘之隘巷再寘之平林三寘之寒
冰皆有以全度者既而收之遂名之棄生有赫靈之異
長有躬稼之勤法施於人以濟粒食堯乃命為農師而
封諸邠農師實后稷也古初造物首出羣理事必出之

本言必天地之際當虞舜之時稱禹平水土契布五教
稷播百穀咎繇明五刑地平天成萬代永賴舜以奮庸
命禹禹讓于稷契咎繇及以元后命禹禹獨讓于咎繇
曰朕德罔克民不依咎繇邁種德德乃降黎民懷之茲
大禹所以言天意永命之所歸缺夏有天下載祀四百
禹之祚也商有天下載祀六百契之祚也周有天下載
祀八百稷之祚也自時厥後百王澆季而咎繇缺積累
在天天祚永歸有所底止乃以無疆之歷命我聖唐盛

德大業與天地准追視三代猶指掌矣昔者周

缺文武

之烈本於后稷后稷之生本於姜嫄故詩曰厥初生民時維姜嫄后稷之子曰不窋失官而奔於戎狄不窋之

孫曰公劉

缺

於豳居以平西戎以篤前烈故詩曰篤

公劉于豳斯館是知姜嫄有德於周公劉有德於豳先賢所出立祠舊矣我國家稱秩元祀咸秩無文山川鬼神亦莫不寧而姜嫄公劉之廟舊制卑陋湫隘在市非所以崇明祀敬鬼神也貞元四年

缺

邠寧節度觀察

使檢校刑部尚書兼御史大夫朗寧郡王張公獻甫戎
醜是膺授鉞而至肅肅王命維公將之烈烈

缺

成之略地千里亭鄣嚴於外啟行一戰弓矢橐於內卒

乘睦而知禮風俗康而狎野覩此二廟獨為匪安公曰

嘻精潔莫重於明神

缺

甚於市鄺奈何雜處乎夫小

人者知鼓舞之事神而不知褻狎之慢神知事神之求

祐而不知慢神之賈禍茂草一去遺塵萬祀

缺而無知

則已若曰有知而喧囂瀆易之俾中夫札瘥天昏之患

者得非長吏慈惠之不足耶乃以不忍人之心行不忍

人之政且為

缺

既而卜遷粵以貞元六年十一月九

日作新廟於南郭馬地則郊野之閑左水右山有清謐
之勝材則楸遷之至上棟下宇非徵斂之

缺

則農務之

隙量功命日無妨奪之弊移嘉木而樹之考良辰而落
之神於是威嚴而蠲乎所處人於是祇惕而遠乎所瀆
是惠人於無過之地而寧神於不怒之境仁為已任不
亦厚乎夫神聰明正直者也唯忠肅恭懿乃能承之順

此而祭不必多品故雖澗谿之毛潢汙之水而君子率是四德陳於二簋行之以禮奉之以懿潔之以齋達之以和則神可得而事焉祐可得而致焉夫子曰丘禱久矣抑為張公尚書以文武之憲純一之良知無不為忠也正色帥下肅也執事有恪恭也擇善而從懿也自先幽州大夫以來一門四人

缺

方繼踵勲績為時心

膺所資非他忠肅恭懿而已用能承天之寵獲神之勞以屏王室以揚家聲也宜哉祠成三歲矣而銘記尚闕

將恐寢遠失其所由乃陳梗槩爰此刊刻辭曰

何賢乎姜嫄曰克生后稷何賢乎后稷曰克降農殖后稷之道至今賴之姜嫄之德如何勿思何賢乎公劉曰

肇宅豳土何

缺

豳土曰平戎之所乃今乃古有廟有宇

宇亦既卑廟亦既摧闌闌朝合跼塵幕開蚩蚩羣毗屑屑徘徊瀆禮非敬犯神有災朗寧戾止理化咸集財豐衆和暴禁兵戢惟此牆屋公私必葺矧伊明祠風雨所及是度是築乃遷乃立奉我皇德達于有神揚神之威

靜乎邊塵亦惟正直克贊忠純勒銘茲庭永示邑人

節度判官殿中侍御史韋丹建立處士張瑄篆

額

唐伯夷叔齊二公碑 并序

安定梁昇卿纂文及書

二公諱伯夷叔齊昔有殷時遼東孤竹君之子也自歷
載所記有國以來事之善者莫先於讓是故君老於位
命立叔齊齊固辭以請伯伯固辭以不嗣遂相與義退

逃逃西周當是時也帝殷不減用錯天紀人棄莫保以
戴于周周武王秉白髦杖黃鉞經綸所以撥亂威略所
以缺罰雷震萬國風行六師二公于時推忠臣之誠明
死君之節伏車而諫慷慨瀝血且夫大運不以時曠達
節不以義距黔首焉得以厭毒鬼神焉得以無主於是
討罪于商為天下王二公以立志真也檢身操也建侯
戡難不可以闕也以臣伐君不可以訓也相於國莫非
其土異於事不食其粟乃西上首陽之山歌采薇而死

蓋天下義感之始也及孔子生東周之季演中興法游
夏之徒皆誨納於教未嘗敝仁人烈士不先于二公者
焉謂不辱其身不降其志矣若乃紛綸茂德載在策府
則太伯之道子臧之仁也上思附義退曰能賢則宋穆
之仁延陵之行也道無不貴志不苟合則許由之尚伯
成之高也慮必中清廢能中權則虞仲之居夷佚之放
也聲缺事載功存業廣則范蠡之去魯連之辭也此數
公者至於黜榮保讓亦為盛矣兼之固君臣之分以愛

其節則曷可以同議也所謂繼之者忠矣杖之者義矣
施之者誠矣用之者確矣昭矣至矣韙矣允矣上古無
以加百代為之憲越大梁歲行于是邦遇縣宰太原王
公惠工訓農勸學敬教羣業賴以繫賴四方咨於作則
邑臨末周人悅有化以為二公廟德不祀實甚懼焉復
何以圖不朽示來者而已遂因簡力考餘時經始是資
敦崇舊規厥構棘翼自公尸之然則表前載揚懿烈使
駿光熊熊彰紀事也以吾學乎舊史氏請隲其文固不

佞乃作銘曰

大道混混或險夷兮殷實荒德莫業缺主人神疑兮帝
用克商大運期兮天下爭利而獨奔義貞名垂兮神農
虞夏氏已沒曷所惟兮斲石千秋聞風規兮黃鉞不降
志缺

開元十有三年惟一月既望刊立衛鶴趙禮范
謙刊

唐故洛州洛陽縣令鄭府君碑

觀夫道周通變青史微其德庸業濟彝倫丹圖敘其景
象所以昭晉長世歲蕤大沝而樹聲之缺爰存相質之
端蓋闕使夫觀巨仲之行者勵思齊之高懷隨會之功
者識與歸之塋著為不朽文在茲乎公諱敞字仲高榮
陽開封至澧鎬為都號鄆獻邑作邦作對策圖謀朝之
謂才乃公乃侯服冕垂軒之謂貴門高階峻慶積祚流
太尉卑躬置屏風而入坐尚書納諫曳草履而昇朝思
元之憂國恤至平卿之刺邪矯枉百世之盛莫之與京

高祖先護後魏雍州刺史尚書右僕射驃騎大將軍儀
同三司襄城公行高言象之表道合運期之數曾祖偉
後魏龍驤將軍北徐州刺史中軍將軍侍中滎陽守襄
城公祖大仕隋上開府儀同三司驃騎將軍渠州刺史
襄城公並文藝武節光罔贊時方龍舟於巨川得騏驎
於大路父仁基隋通事舍臣研深機以開務邁弘操以
範俗公降巖廟之宏器蹈珠玉之朗節化其羽翼既收
四見之奇伐其條枚匪辭一覲之速貞觀七幸制策高

第搔越州都督府叅軍事探其洞穴史惠識微禹之功
步彼高衢而子得遺風之垂入除左領軍衛兵曹又除
潞州司功叅軍事六軍七校戎政孔殷十命三牒缺府
邑之靈氣流榮波之純液直躬正色清嚴凜乎秋霜抱
質懷文英穎彬於夏采挹損以弘已寵辱若驚靖恭以
臨至敬慎如祭宗望推重名為通事舍至留疾不拜
轉瀛州清苑令公以為立長以為官也非立官以為長
也於是明察以斷忠信以寬姦利息機則俗化醇厚浮

末不驚則至用豐殷岳以立身清逾十仞言必顧義寶
過盈尺故至有神明之敬缺有父母之親欣詠終朝石
碑在頌又為岐州雍縣令政如清苑亦有德碑又除益
州新繁令加朝散大夫入為司裡貲外郎增秩小黃歸
大夫之顯祿拔奇禮學綜郎官之明祀轉駕部郎中檢
校洛陽令俾入都至掌儀輦政京大師衆禁疎網濶情
有萬源道難一貫公綜理殷劇馭煩以簡高義俾於昇
雲明道著於夏日旌發伏隱察銖兩之奸導揚滯美盡

銜箕之利化其善教戎至楚言懷其令聲蟹匡蠶績加
以勵精聽斷之術側席俊秀之才稜威於七貴五侯滅
私於四隱六戚令至除雪既察孝廉行馬療寒即收門
士權豪由其斂手雞犬所以罕音王渙已來政風曠絕
稱職之美復存於公朝以為能去除洛陽縣令無何丁
太夫至憂服勤過禮執喪惟病罔極之心應於木石天
降大感光覆不追春秋六十九儀鳳三季十一月十七
日終於萬壽縣之來庭里第嗚呼哀哉粵以大周久視

元章龍隼庚子六月戊寅朔七日甲申遷寔於洛陽北
邱山之平樂原禮也惟公履仁居德韞風懷雅宏達不
器包容無方牆隩之深則幽室十扉洞房百牖言之
重則商湯之駟夏后之璜故能叅神明以長至順日月
以曜物剛直以斷金之精也溫潤以潔玉之符也方弼
承帝則運平而機致君唐虞之上書美荆越之竹豈徒
校才班伯願試定襄之煩比義野王求領長安之劇而
信順

缺

而逾毀陽烏假

道過峻岐而不息崩獮慕於霜露歸精靈於缺辰昔鄭

相云亡捨玦悲於東里羊公既歿罷市慟於南州瞻古

揆今不之遠也飾終以薄遺令在言時服編書與揪衣

而共下含珠連玉同瓦器而不藏長子朝議大夫行果

州司功叅軍諡第二子越州都督府士曹叅軍諡第三

子符寶郎諡第四子太子典設郎諡第五子宋州司功

叅軍諡等罄節勵行彥士高其式謨積學儲寶詞生貴

其淵洽州閭化其邕穆神明通其孝弟思所以揚德來

裔垂文永牽託之不刊以申罔極我聞有命敢作銘云
遷周從號為公作伯漢台晉袞邦基政本繼期生愆時
惟我君猶彼靈鳳翰飛紫氛行高德廣如山如雲曾不
助順慙留斯文北山伐石西邛負土撤殯毀宗遷車奠
祖羣子克孝墳塋終古慕義長號誰謂荼苦

大周久視元年六月七日建鳳閣舍至河東薛

稷為文并自書丹

碑內地作塋天作而人作至
臣作惡國作國授作斃正作

正日作日年作年之
類皆武后所製字也

唐故通議大夫行薛王友柱國贈祕書少監國子

祭酒太子少保顏君廟碑銘

并序

第七子光祿大夫行吏部尚書充禮儀使上柱國魯
郡開國公真卿撰并書

集賢學士李陽冰篆額

昔孔悝有夷鼎之銘陸機有祠堂之頌皆所以發揮祖
德敷演家聲故君子之觀其銘也既美其所稱又美其
所為無而稱之是誣也有而不述豈仁乎論而譏之敢

不祇懼君諱惟貞字叔堅其先出于顓頊之孫祝融
孫安為曹姓其裔缺邾武公名夷甫字顏子友別封邾
為小邾子遂以顏為氏多仕魯為卿大夫孔門達者七
十二人顏氏有八戰國有率躅秦有芝貞漢有異肆安
樂其後喪亂譜牒云亡魏有裴盛盛字叔臺青徐二州
刺史關內侯始自魯居于琅邪臨沂孝悌里生廣陵太
守給事中葛繹貞子諱欽字公若精韓詩禮易尚書學
者宗之生汝陰太守護軍襲葛繹子諱默字靜伯生晉

侍中右光祿大夫西平靖侯諱含字弘都隨元帝過江
已下七葉葬在上元幕府山西生侍中光祿勳西平定
侯諱髦字君道事具孝行傳生州西曹騎都尉西平侯
諱絺字文和生宣城太守御史中丞諱靖之字茂宗生
巴陵太守度支校尉諱騰之字弘道善草隸書有風格
梁武帝草書評云顏騰之賀道力並便尺牘少行於代
生輔國江夏王叅軍諱炳之字叔豹以能書稱生齊侍
書御史兼中丞諱見遠字見遠和帝被弑一慟而絕梁

武深恨之事見梁周北齊書生梁鎮西記室參軍諱協
字子和感家門事義不求聞達元帝著懷舊詩以傷之
撰晉仙傳五篇日月災異圖兩卷文集廿卷見梁書生
北齊給事黃門侍郎待詔文林館平原太守隋東宮學
士諱之推字介著家訓廿篇冤魂志三卷證俗字音五
卷文集卅卷事具本傳黃門兄之儀周御正御史中大
夫麟趾學士隋文輔政不署矯詔索璽又拒之出為集
州刺史新野公後朝朔望引至御榻曰見危授命臨大

節而不可奪古人所重何以加御事具周書弟之善隋
葉令子孫見於後黃門生皇秦王記室諱思魯愍楚遊
秦小記室字孔歸君之曾祖也隋司經校書東宮學士
率子弟奉迎義旗於長春宮缺瓜州拜儀同博學善屬
文自為父集序國史稱溫大雅在隋與思魯同事東宮
彥博與愍楚同直內史省彥博將與遊秦同典校祕閣
二家兄弟各為一時人物之選少時學業顏氏為優其
後職位溫氏為盛溫氏譜亦載焉生勤禮字敬君之祖

也幼而朗悟識量弘遠工於篆籀尤精詁訓解褐校書
郎與兩兄弟師古相時同時為弘文崇賢學士弟育德
又於司經校定經史當代榮之太宗嘗令師古讚崇賢
學士以兄弟特命蕭鈞讚之曰依仁服義懷文守一履
道自居下帷終日德彰素里行成蘭室鶴鑰馳譽龍樓
委質著作郎修國史夔府長史贈虢州刺史生昭甫敬
仲殆庶無恤少連務滋辟彊昭甫字周卿君之父也幼
而穎悟尤明詁訓工篆籀草隸書與內弟殷仲容齊名

而勁利過之時為伯父師古所賞重每有註述必令參
定嘗得古鼎卅餘字舉朝莫識盡令讀之高宗侍讀曹
王屬贈華州刺史真卿表謝肅宗批荅卿之乃祖當為
碩儒既高倚相之能遂有臧孫之後不墜其業在卿之
門生我伯父諱元孫臬君伯父聰穎絕倫尤工文翰舉
進士考功郎劉奇特標榜之由是名動海內累遷太子
舍人玄宗監國專掌令書嘗和遊苑詩批云孔門稱哲
宋室聞賢翰墨玄捷莫之與先歷滁沂濠三州刺史贈

祕書監君仁孝友悌少孤育舅殷仲容氏家蒙教筆法
家貧無紙筆與兄以黃土掃壁木石畫而習之故特以
草隸擅名天授元年餉口考校判入高等以親累授衢
州叅軍與盈川令楊炯信安尉桓彥範相得甚歡又選
授洛州溫縣永昌二尉每選皆判入高科侍郎蘇味道
以所試示介衆曰選人中乃有如此書判嗟歎久之遂
代兄為長安尉太子文學以清白五為察訪使魏奉古
等所薦王邕初開盛選僚屬拜薛王友柱國伯姊御史

大夫張知泰妻魯郡夫人亡將葬數家占君不宜臨壙
君哭而拒之曰豈有忘手足之痛牽拘忌而忍自絕乎
弗從其年秋七月哉生明邁疾而歿教義者隱而傷焉
與會稽賀知章陳郡殷踐猷吳郡陸象先上谷寇泚河
南源光裕博陵崔璵友善事具陸據所撰神道碑累贈
祕書少監國子祭酒太子少保真卿表謝肅宗批荅云
卿之先人德行優著學精百氏藝絕六書頻陟甲科屢
升循政曳裾王府名右鄒枚載筆春宮道高徐沈既而

壽年華髮器紆青雲業載史臣慶傳令子追存盛美褒
贈崇班且旌善於義方俾揚名於有後濠州生春卿杲
卿曜卿旭卿茂曾春卿工詞翰倜儻有吏材蘇頌舉茂
才偃師丞杲卿父理清峻所居有聲太常居攝常山太
守祿山反擒其心腹開土門拜衛尉卿兼中丞城陷杲
卿叱詈之遂被鉤舌支解而終贈太子太保諡曰忠節
真卿表謝肅宗批荅云自安史猖狂入我河縣所在官
吏多受迫脅卿兄以人臣大節獨制橫流或俘其謀主

或斬其元惡當以救兵懸絕身陷賊庭旁若無人歷數其罪手足寄於鋒刃忠義形於顏色古所未有朕甚嘉之曜卿工詩善草隸十五以文學直崇文館淄州司馬旭卿善草書脣山令茂曾好屬文詁訓仁厚絕衆捷為司馬君生闕疑允南喬卿真長幼與真卿允藏闕疑仁孝有吏能精詩傳善剖判杭州叅軍允南仁孝有清識工詩人多誦其佳句善草隸與春卿景卿曜卿同日於銓庭為侍郎席建侯所賞達奚珣薦為左補闕真卿時

為殿中正至三拱法座蹈舞而衣袂相接者三故允南
賦詩云誰言百人會兄弟也需陪歷殿中膳部司封郎
中司業金鄉男喬卿仁和有吏幹富平尉真長清直早
世幼與方雅有醞藉通班漢左清道兵曹真卿早孤蒙
伯兄允南親自教誨舉進士歷校書制舉醴泉尉陟清
白長安尉三院御史四為大夫六為尚書再為採訪節
度充禮儀使光祿大夫魯郡公允藏敦質孝悌有吏能
制舉延昌令監察充朔方衣資使殿中三為侍御史中

允江陵少尹荆南行軍濠州及君孫泉明佐父開土門
彭州司馬威明邛州司馬李明子幹沛誦頗誕及外孫
博野尉沈盈盧述並為祿山所害各蒙贈五品京官濬
好屬文翹華正頗慈明都水使者頗好五言校書頗仁
孝方正明經大理司直嶺南營田判官執喪九日不食
頤河陽尉顓鳳翔參軍頗工小楷洗馬頤恭仁奉禮郎
並早喪逝紘方義主簿泉明覲並沒蠻襲明徵明德明
未仕通明獲嘉尉將明昌明尉克明崇文明經衛密標

榜之翽有德行文詞華原主簿準漂水尉覲頗工文襄
陽尉覲有文行弘文進士顯仁友清白常熟令封金鄉
男穎清介勤學侍郎蔣冽賞其判京兆兵曹襲金鄉男
岫仁純常熟主簿任城男頤浚儀尉頌清源尉頂幹辦
揚府法曹願長厚清白朝邑尉願左率倉曹碩祕書正
字頤有吏幹歙州錄事叅軍曲阜男頤好為詩富陽尉
顥好為文常州叅軍並粗有所立君之諸祖諸父羣從
揚庭頤並侍讀強學益期並學士中和至誠敬仲大智

溫之澂之澹之措挺援撰溫泳陵並明經康成強學希
莊日損隱朝鄰幾知微舒說順式宣韶並進士制舉有
意中和趨庭希莊至刺史利仁明天丈欣期元淑景靈
並校書光庭注後漢書嘉賓千里昇庠斥朝怡滔渾允
濟措逸覲防有文詞博古少連恭敏惇學行敬仲溫之
以孝聞潤有風義冕鱗邈迨以清白稱其餘咸著官族
不獲悉數洪惟累祖之耿光王業有君子衆弘都之德
行巴陵記望之書翰特進黃門之文章祕監華州之學

識肇自魯國格于聖代紛綸盛美遂舉集于君君能述
遵前人不致失墜其事以忝聿修宜其克饗尊榮為清
廟不祧之主真卿幸承遺訓叨受國恩既荷無疆之休
敢揚不朽之烈銘曰

系我宗邦顏公子封鄉魯附庸亞孔聖浴沂風刺青徐
給事中護營柳渡江楓侍兄疾感蛇童鄰火斷珥貂重
施七葉傳孝恭武騎都尉司從便尺牘繼魚蟲慟君難
憤而終咨施室游湘東嗟禦正凜移忠泉黃門擅文雄

三韶長事東宮四穆叔史牢寵褒華州詒訓通小祕監
盛名鴻維少保丈翰工蒞畿赤五褒崇登望苑友桂叢
三超贈保儲躬流光盛廟貌融永不桃垂無窮

建中元年歲次庚申秋七月癸亥朔鵠畢八月
己未真卿蒙恩遷太子少師冬十月壬子男頤
封沂水縣男碩新泰縣男姪男頂缺縣男頌費
縣男頤鄒縣男微軀官階勳爵並至二品子姪
八人受封無功無能叨竊至此子孫敬之哉

隋柱國左光祿大夫弘義明公皇甫君碑

銀青光祿大夫行太子左庶子上柱國黎陽縣開國

公子志寧製

夫素秋肅殺勁草標於疾風叔世艱虞忠臣彰於赴難
銜鬚授命結纓殉國英聲煥乎記牒微烈著於旂常豈
若豐起蕭牆禍生蕃翰強踰七國勢重三監其有蹈水
火而不辭臨鋒刃而莫顧激清風於後葉抗名節於當
時者見之弘義明公矣君諱誕字玄憲安定朝那人也

昔立効長丘樹績東郡太尉裂壤於槐里司徒胙土於
郾門是以車服旌其器能茅社表其勲德銘功衛鼎騰
美晉鐘盛族冠於國高華宗邁於樂卻備在史牒可略
言焉曾祖重華使持節龍驤將軍梁州刺史潤木暉山
方重價於趙璧媚川照闕曜奇采於隨珠祖和雍州贊
治贈使持節散騎常侍車騎大將軍儀同三司膠涇二
州刺史高衢將騁遽跋追風之足扶搖始搏早墜垂天
之羽父璠使持節驃騎大將軍開府儀同三司隨州刺

史長樂恭侯橫劍柱朽威重冠軍枰理蕃條聲高勃海
公量包申伯稟嵩山之秀氣材兼蕭相降昂緯之淑精
據德依仁居貞體道含章表質詎待變於朱藍恭孝為
基寧取訓於橋梓鋒剗犀象百鍊挺於昆吾翼掩鴛鴻
九萬奮於溟海博韜缺產丈瞻卿雲孝窮溫清之方忠
盡匡救之道同何充之器局被重晉君類荀攸之宏圖
見知魏主斯故包羅衆藝囊括羣英者也起家除周
畢王府長史榮名蕃牧則位重首寮袞服睢陽則譽光

上客既而蒼精委馭炎運啟圖作貳邊服實資令望授
廣州刺史悅近來遠變輕詆於雕題伐叛懷柔漸淳化
於緩耳蜀王地處維城寄深磐石建旗玉壘作鎮銅梁
妙擇竒材以為僚佐授公益州總管府司法昔梁孝開
國首辟鄒陽燕昭建邦肇徵郭隗故得馳令問於碣館
播芳猷於平臺以古方今彼此一也尋除尚書比部侍
郎轉刑部侍郎超步紫庭光映朝列折旋丹地譽重周
行俄遷治書侍御史彈違紕慝時絕權豪霜簡直繩俗

寢貪競隨文帝求衣待旦志在恤刑呪網泣辜情存緩
獄授大理少卿公巨細必察同張季之聽理寬猛相濟
比于公之無冤但禮闈務殷樞轄寄重允膺此職實難
其人授尚書右丞洞明政術深曉治方臧否自分條目
咸理丁母憂去職哀慟里閭鄰人為之罷社悲感衢路
行客以之輟歌孝德則師範彝倫精誠則貫徹幽顯雖
高曾之至性何以加焉尋詔奪情復其舊任于時山東
之地俗阜民澆雖預編民未行聲教詔公持節為河北

河南道安撫大使仍賜米五百石絹五百匹公輜軒布
政美冠皇華之篇擁節觀風榮甚繡衣之使事訖反命
授尚書左丞然并州地處叅墟城臨晉水作固同於西
蜀設險類於東秦實山河之要衝信蕃服之襟帶授公
并州總管府司馬加儀同三司公贊務大邦聲名籍甚
精民感化黠吏畏威屬文帝劍璽空留鑾蹕莫反楊諒
率太元之甲擁河朔之兵方叔段之作亂京城同州吁
之挺禍濮上雖無當璧之兆乃懷奪宗之心公備說安

危具陳逆順翻納魏勃之策反被王悍之災仁壽四年
九月溘從運往春秋五十有一萬機起殲良之歎百辟
興喪予之悲切孔氏之山頽痛楊君之棟折贈柱國左
光祿大夫封弘義郡公食邑五千戶謚曰明公禮也喪
事所須隨由資給賜帛五十段粟三千石惟公溫潤成
性夙表白虹之珍黼黻為文幼缺

行已窮於

六本蘊德包於四科延閣曲臺之奇書鴻都石渠之祕
說莫不尋其枝葉踐其隩隅譬越箭達犀飾之以括羽

楚金切玉加之以磨缺救乏同於指困親識待其舉火

進賢方於推轂知己俟以彈冠存信捨原黃金賤於然

諾忘身殉難性命輕於鴻毛齊大小於冲襟混寵辱於

靈府可謂缺

冠冕時雄者也方當亮采泰階叅

綜機

缺

豈謂世逢多故運屬道消未展經邦之謀奄鍾

非命之酷世子民部尚書上柱國滑公無逸以為邢缺

之下缺

仲之缺

之東誰知子孟之墓乃雕戈

勒石騰實飛聲樹之康衢永表芳烈庶諸葛之隴鍾生

禁之以樵蘇賈遠之碑魏君歎之以不朽乃作銘曰

缺二
十字

膺

期穆帝運榮經綸執鈞匡濟門承積慶世挺偉人夜光

愧寶朝采慙珍雲中比陸日下方荀抑揚元

缺二十
一字

名馳碣石

聲高建禮珥筆憲臺握蘭文陛分星裂土建侯開國輔

籍正人相資懿德中臺輟務晉陽

缺十
七字

相成師構難太叔興戎建德効

節夷吾盡忠命屯道著身歿名隆牛亭始卜馬鬣初封

翠碑刻鳳丹旂圖龍煙缺

銀青光祿大夫歐陽詢書

六藝之一錄卷一百十七

欽定四庫全書

六藝之一錄卷一百十八

錢塘倪濤撰

石刻文字九十四

金薤琳琅

唐故右武衛將軍贈工部尚書上柱國上蔡縣開

國侯臧公神道碑銘

并序

金紫光祿大夫行撫州刺史上柱國魯郡開國公顏

真卿撰并書

翰林待詔光祿卿李秀巖篆額

公諱懷恪字貞節東莞人其先出于魯孝公之子彊字子臧大夫不得祖諸侯其孫以王父字為氏僖哀二伯既納忠於魚鼎文武兩仲亦不朽於言哲丈人成功而遁迹子原抗節而捨生義和辭金飾之器榮緒奮陽秋之筆賢達繼軌紛綸至今曾祖滿隋驃騎將軍祖君寵皇通議大夫靈州督府長史父善德朝散大夫贈銀州刺史咸務遠圖克開厥後恤肩之慶世祀宜哉公即銀

州之第三子也身長六尺一寸眉目雄朗鬚髯灑秀雅
善騎射尤工尺牘沈靜少言寬仁得衆奇謀冲邈英勇
冠倫友于弟兄謹爾鄉黨每敦詩而執禮不如柔以吐
剛莅事而剖判泉流臨戎而智略鋒起古所謂文武不
墜高明有融者焉少以勲勞亟紆戎級開元初嘗遊平
盧屬奚室韋大下公挺身與戰所向摧靡繇是發名立
宗聞而嘉之拜勝州都督府長史銳精佐理絜矩當官
朔漠不空邊隅用命俄拜左衛率府左郎將轉右領軍

中郎將兼安北都護中受降城使朔方五城都知兵馬
使我事齊足十萬維羣我伐用張軍威以肅由是深為
節度使王峻所器奏充都知兵馬使嘗以百五十騎遇
突厥默啜八部落十萬餘衆於狼頭山殺其數百人引
身據高環馬禦外矢集如雨公徒且殲遽而紹之曰我
為臧懷恪勅令和汝何得與我拒戰于時僕固懷恩父
設之適在其中獨遮護之諸部落持疑不肯公封羊以
盟之仗義以責之衆皆感激由此獲免遂與設之部落

二十帳來歸後充河西軍前將盤禾安氏有馬千匹四怙
富不虔一族三人立皆毆斃軍州悚懷疇敢不祇缺為
節度相國蕭嵩所賞後充河源軍使兼隴右節度副大
使關西兵馬使拜右武衛將軍吐蕃不敢東向者累年
俄封上蔡縣開封侯開元十二年歲次甲子春二月二
十有六日薨于鄴城之官舍享年五十六其年八月二
十三日詔曰故具官某頃以幹能亟承任使操行逾謹
勞効未酬不幸遷殂良增追悼可贈右領軍衛大將軍

即以其年冬十月庚戌遷寔于京兆府三原縣北原禮也嗚呼公兄左羽林軍大將軍平盧副持節懷亮以方虎之材膺爪牙之任孔懷斯切致美則深七子游擊將軍崇仁府折衝希崇豐州別駕贈宋州刺史希昶左武衛將軍朔方節度副大使贈太子賓客希忱右衛左郎將劔南討擊副使贈汝州刺史希愔右驍衛郎將靜邊軍使贈祕書監希景寧州刺史左金吾衛將軍贈揚州大都督希晏開府儀同三司行太子詹事兼御史大夫

邠寧山南觀察使集賢待制工部尚書渭北節度使魯國公希讓等夙漸詩禮恭承教義芬潤挺蘭玉之姿英威鬱虜礪之質而希讓識度弘遠器謀沈邃仁親以孝殿國以忠綽裕冠於人倫勲勞懋於王室至德中今上為元帥東伐肇允押牙從收兩京陟降左右入侍帷幄既崇翼戴之功出擁麾幢載叶澄清之寄加以篤睦羣從糾綏宗族吉凶瞻恤終始無渝行道之人孰不嗟尚肅宗以公有謀翼之勤乾元元年春三月贈魏州刺史

寶應元年冬十月又贈太常卿廣德元年冬十月詔曰
孝以立身可揚名於後代忠能事主故追榮而及親開
府儀同三司兼御史大夫元帥都虞候魯國公臧希讓
亡父贈太常卿懷恪業茂勲賢地華簪紱佩忠信而行
已包禮樂以資身守節安卑幽貞自處養蒙全正聲利
不營雖與善無徵促靈悲於逝畧而積善垂福餘慶光
於後昆故得業濟艱難功參締造况出有藩條之寄入
多爪牙之任位以德遷禮宜加等父由子貴贈合超倫

宜登八座之榮式慰九泉之路又贈工部尚書褒異之
典於斯為盛臧氏自驃驍而下世以材雄朔陞尚書既
還特以功懋當代兄弟子姪勲賢間出自天寶距開元
乘朱輪而拖珪組數百人迨于今茲繁衍彌熾綰軍州
而握兵要者相望國都有後之慶固殊異於他族者矣
真卿早歲與公兄子謙為田蘇之游敦伯仲之契晚徙
大夫之後每接嘗寮之歡故公之世家竊備見聞敢述
遺烈將無媿詞銘曰

魯史褒者臧孫有之陳魚則諫納鼎以規歿貴言立時
稱聖為仁昭典墳智叶著龜世濟忠肅肅光羽儀以至
夫公英明雄毅鶚視騰彩龍驤作氣鋒淬霜陵妙窮金
匱謀猷泉瀉翰墨風駛儒勇是兼勲庸以位介馳戎馬
猛奮虓虎絕漠援孤連兵戰苦萬衆鳴鏑紛紛如雨一
身抗詞諤諤連柱精貫霜日氣雄鉦鼓敵人義激僕固
誠全眇漫窮裔隨降幾千野靜沙雪風恬寒煙我騎如
雲我旗連天牧無南向凱有北全天子休之命侯開國

謂福而壽康衢騁力奚命之遭幽局是即十城玉折萬
里鵬息陣雲蒼蒼日暮無色令人趨奉天眷孔明九原
不作八座哀榮勇烈徽範芳時懿名里成冠蓋族茂簪
纓萬古千祀瞻言涕零

唐開府儀同三司行尚書右丞相上柱國贈太尉
廣平文貞公宋公神道碑銘并序

金紫光祿大夫行撫州刺史上柱國魯郡開國公顏
真卿撰并書

於戲逆鱗劇上匡救之義深守死不回臣人之致極況乎文缺風雅道濟生靈建一陽而天下倚平含九德而三光式序超無友而獨立者其唯廣平公乎公諱璟字缺邢州南和人其先出于殷王元子七代祖弁魏吏部尚書襲列人子祖欽道北齊黃門侍郎並事迹崇高各見本傳高祖元節定州田曹曾祖弘峻大理丞祖務本皇櫟陽令父玄撫衛州司戶贈戶部尚書自田曹至于尚書皆實浮於名而位不充量事見許公蘇頌所撰神

道碑公七歲能屬文一遍誦服鳥賦丁尚書府君憂水
漿絕口者五日八九歲時嘗夢大鳥銜書吐公口中而
咽之遂乘而直上倏忽驚悟猶若下在胸間自後藻思
日新襟靈益爽年十六

缺

讀易曠時不精公遲而覽

之自亥及寅精義必究明年進士高第補上黨尉轉王
屋主簿相國蘇味道為侍御史出使精擇判官奏公為
介公作長松篇以自興梅花賦以激時蘇深賞歎之曰
真王佐才也轉合官尉長壽三年從調判入高等有司

特聞天后親問所欲公以代為唐臣不求榮達詭奏云
家本山東願得魏之一吏遂手詔授錄軍叅軍拜舞趨
出異而召還又手詔拜監察御史裏行丁齊國太夫人
憂服闋築室反耕志圖不起俄而即真遷殿中待御史
同列有博于臺中者將責名品而黜之博者惶恐自匿
公獨正辭引過天后悅而釋之遷天官員外郎鳳閣舍
人御史中丞乃謂所親曰吾比欲優游鄉里不圖要近
驟至於斯其敢廢所職乎乃悉心納忠無所回避時張

易之昌宗兄弟席寵脇權天下側目公危冠入奏奮不顧身天后失色蒼黃欲起公扣頭流血誓以死爭拾遺李邕奏曰陛下坐則天下安起則天下危內史令出公曰天顏咫尺親奉德音不勞宰臣擅宣王命詞氣慷慨天后震悚遂俱攝詣臺廷立切責二豎股栗氣索不敢仰視自朝至于日昃敕使馳赦之公不得已而罷又令詣公謝罪公拒之後有慘恤二豎來弔公辭曰貴近不宜與執政通問假滿朝士慰公二豎又欲序進公舉板迎

揖之不得成禮而去神龍之興復也公實佐奇謀及當

疇庸讓而不受曰清宮問罪事

缺

五王祀夏中興功歸

明主非曰逃賞誰敢貪天俄拜朝散大夫吏部侍郎兼

諫議大夫遷黃門侍郎嘗過梁王武三思於朝三思方

欲言事公正色謂之曰當今復子明辟王宜以侯就第

何得上干朝政三思慙懼而退請急累月俄而兼攝尚

書左丞中宗將幸西京深虞北鄙乃兼檢校并州大都

督長史又改兼貝州刺史與數人同辭

缺

三思獨揖公

住公顧謂之曰諸人已出不可獨留遂揖之而去屬年穀不登國租罷入三思食邑公悉蠲之既屢挫其鋒亦處之自若俄而真拜轉杭州又遷相州又為洛州長史唐隆初拜吏部尚書同中書門下三品粵五日兼右庶子尋加銀青光祿大夫玄宗之在儲闈鎮國太平長公主潛謀廢立嘗於光範門內坐步檐中諷宰相以此旨諸相失色莫敢先言公盛色詰之曰春宮有大功主安得異議遂奏婦人干政恐生禍階請不令朝謁俄而男

又縱橫公奏之繇是貶楚州刺史主亦竟以凶終無何
復拜銀青歷魏充冀三州兼河北按察使尋遷幽州都
督兼御史大夫復為魏州入為國子祭酒東都留守開
元二年拜御史大夫兼京兆尹貶睦州刺史轉廣州都
督充按察經略討擊使又兼御史大夫特許便宜從事
前是首領桀驁多據洞不賓公之下車無敢不畏彼之
風俗缺趨苟簡茅茨竹櫨比屋鱗次火災歲起煨燼無
餘公教之度材變以陶旋千甍齊翼萬堵皆興于今賴

之燕國公張說嘗為碑頌無何使中官楊思勗召公公
拜恩而就馬便行在路竟不交一言思勗以缺軍貴達
泣辭訴帝帝嗟歎久之拜刑部尚書四年遷吏部兼黃
門監監修國史五年復兼侍中明年駕達東都至三嶠
馳道隘稽車騎不得前河南尹李朝隱知頓使中丞王
怡並坐當降黜公奏曰若致罪二臣將來必受其弊遂
命公捨之曰陛下責之以臣言免之是過歸於上恩由
於下臣請使其待罪然後俾其復職遂嘉而從之玄宗

嘗命公名諸王公及公主邑號既而又令各定一美名
公奏稱七子均養鴈鳩之德錫以名號不宜有殊若母
寵子異恐非正家之道王化所宜玄宗悅而從之八年
拜開府儀同三司進爵廣平郡開國公策勲上柱國狂
豎權梁山構逆長安有司深探其獄公按覆如京兆司
錄李如璧等百餘家皆以借宅假器悉當連坐公以婚
姻假借天下大同至于京城其例尤衆知情即是同反
無罪不合論辜兇渠之外一切原免天下欣服馬中書

令河東公張公傑出將明之材獨運廟堂之上鏡機朝
激見事風生求公規模悉閱堂案每至危言讜議執正
守中未嘗不廢卷失聲汗流洽背其為通賢所服也如
此十三年駕幸東都以公為西京留守公極言得失無
有所隱玄宗感悅制曰所奏之言置諸座右出入觀省
以誠終身因賜綵物二百疋明年又兼吏部十七年拜
尚書右丞相雅善戲謔不常矜莊與故缺尚書王賔
為莫逆之友晚而彌篤凡所詼諧人輒疏取端五日蒙

賜鍾乳命醫歸鍊或以為上藥殊異不宜委之公曰推誠求信猶懼弗應猜以待人信其可得聞者慙退廿一年抗疏告老至于再三手詔優遂特給全祿賜絹五百疋還東京公以為大臣歸休不宜闕通人事遂杜絕賓客其年駕幸洛陽公迎拜道左玄宗親駐龍蹕使榮王琬勞問者數四自後中使往來賞賚不絕方崇乞言之典以極師臣之敬廿五年仲冬月十有九日寢疾薨于東都明教里第享年七十五天下失聲玄宗震悼追贈

太尉諡曰文貞公賻物米粟常數有加喪葬官供仍詔
河南少尹崔釋之充監護使夫人齊國夫人博陵崔氏
滄州長史藝之女淑慎嚴整高明柔克訓諸子而慈且
有威佐丞相而德無違者門內之理一以見咨躡公而
歿允終偕老嗚呼公有七子復同州司功先公而卒昇
尚書郎太僕少卿尚漢東太守渾職方郎中諫議大夫
御史中丞東京畿採訪使太子左諭德恕都官郎中延
太原少尹華判入高等登封尉尉氏令衡右散騎常侍

兼御史中丞河西節度行軍司馬或肅或文或哲或義
克篤前烈以休令聞以戊寅五月廿五日虔奉遺約歸
葬公于沙河縣太尉鄉丞相原之先塋夫人合而祔焉
禮也惟公間氣降神應期傑出生知禮度天縱才明玉
立殿天子之邦介然秉大臣之節震電憑怒讜言而不
有厥躬鼎鑊沸前臨事而義形乎色蠹迪檢押難常情
之所易志深直諒易古人之所難外其身而富貴不離
行其道而死生弗替非夫合一之德格于皇天不二之

心形于造次則何以缺是乎允所謂振古之元龜皇王之威寶者矣且夫公之德烈充塞寰寓公之謀猷著明日月大厯五年冬十二月孫儼懼遺盛美不遠求蒙以真卿天祿校文叨太僕之下列憲臺執簡承諭德之深知雖青史傳信實錄已編於方冊而豐碑勒銘表墓願備於論譔謹憑吏部員外郎盧僎所上行狀略陳萬一多恨闕遺其辭曰

天命玄鳥降而生商湯孫之緒微子分疆詞招正則尉

翼文皇吏部黃門紛綸耿光忠賢世出信史相望寫生
丞相祚我有唐文明純嘏毅烈堅剛恒衛間氣星辰降
芒嶷然山立鏗爾金鉞忠孝之盛人倫紀綱垂髻能文
夢鳥發祥通宵究易冲齡擅場勝冠結綬歷政洋洋乃
尉合宮貳軺琅琅賦嗤梅豔篇美松長蘇公嗟稱才必
佐王滿歲從調試言高驤登聞黼宸驟列繡裳簞迹天
官如圭如璋司言鳳閣綸綍煌煌乃作中丞威稜莫當
志除兇狡廷劾二張天后愕怡百寮震惶公獨凜然出

身激昂義形顏色精貫穹蒼皇室中興嘉謀克彰功成
牢讓事軼屠羊貳職選曹諫議是匡載清流品屢奏封
章乃侍瑣闥時維夕郎悉心糾正庶績咸康三思睢盱
席寵干常基之就第慙懼靡亢左曹攝轄大國于襄蕪
刺貝丘朋辭雁行三思揖語公獨循牆處之不忤轉旆
于杭既還鄴城遂尹洛陽乃作冢宰訐謨廟堂俄蕪宮
相亟綰銀黃玄宗登儲鎮國是遑潛謀廢立謠詠相翔
厥男撓政累奏愆殃聿臨楚邦荐察蕪方總督幽薊翻

飛國庠亞相烈烈尹京趙趙旋臨建德歟蒞南荒俚師
咸莩茅擣是攘張公頌德雋永甘棠所忠來召拜命即
裝路無交言帝用式臧載司刑吏八座抑揚兼監黃樞
鈞軸是將匪躬蹇蹇終始沈沈乃拜儀同允釐保障河
東閱故汗洽如漿狂豎犯關兇渠既戕命公覆獄咸脫
死亡乃宅右揆右揆泱泱每詭王君豈常矜莊懸車告
老庶保康強方崇饋醕孤映纁緇天不憖遺萎哲壞梁
一人震悼九有淒涼市既罷賈春仍絕糧乃贈太尉飾

終禮滂返葬沙河羽儀央央闔朝傾阻河尹護喪生榮
死哀行路感傷令人孺慕攀泣煌煌高墳崔嵬鉅鹿劇
旁森稍宰樹繚繞連岡于嗟廣平宅此不暘孝孫翼翼
論譔靡忘豐碑碣豎萬古訾相

大厯七年歲次壬子九月二十五日孫儼追建

唐故太尉文貞宋公神道碑側記

初公任監察御史持服于沙河縣屬突厥寇趙定州河
朔先懼邢州刺史黃文軌投艱于公公以父母之邦金

革無避及賊至城下公為曉陳禍福其徒有素聞公威名者乃相率而去之開元末安西都護趙含章冒于貨賄多以金帛賂遺朝廷之士九品以上悉皆有名其後節度范陽事方發覺有司具以上聞玄宗切責名品將加黜削公一無所受乃進諫焉玄宗納之遂御花萼樓一切釋放舉朝皆謝公衣冠儼然獨立不拜翌日入奏玄宗謂公曰古人以清白遺子孫乃卿一人而已公曰含章之賄偶不至臣門非不受也玄宗深嘉歎之前碑

關焉故略述于此公第三子渾之為中丞也方欲陳乞
御制碑頌未果而中受譴謫旋安史作亂事竟不成真
卿時忝監察殿中為中丞屬吏故公孫儼泣請真卿論
譏之昭義軍節度觀察使尚書左僕射兼御史大夫平
陽郡王薛公曰嵩以文武忠義之姿為國保障上慕公
之德業歎尚無窮次嘉儼之懇誠崇豎莫致迺命屯田
郎中權邢州刺史封演購他山之石曳以百牛缺刻字
之工成乎半載磨礱既畢建立斯崇遠近嗟稱古今榮

觀雖大賢為德樹善何限於存亡而小子何知附驥托
跡於階序真卿刺湖州之日因成文請儼刻其側而志
之未及雕鐫而第六子衡因謫居長州叅佐戎幕河隴
失守介于吐蕃以功累拜工部郎中兼御史河西節度
行軍司馬與節度周鼎保守燉煌僅十餘歲遂有中丞
常侍之拜恩命未達而吐蕃圍城兵盡矢窮為賊所陷
吐蕃素聞太尉名德曰唐天子我之舅也衡之父舅賢
相也落魄於此豈可留乎遂贈以駝馬送還于朝大厯

十二年十一月以二百騎盡室護歸士君子偉之乃古
來所無也上欲特加超獎且命待之于側門十三年春
三月吏部尚書顏真卿記

唐故太尉兼中書令西平郡王贈太師李公神道

碑銘

并序

特進守司空兼門下侍郎同中書門下平章事充集
賢殿大學士上柱國晉國公臣裴度奉勅撰

朝散大夫守尚書庫部郎中翰林侍書學士上柱國

賜紫金魚袋臣柳公權奉勅書并篆額

惟天錫成命於我唐保茲國祚生此人傑則西平王李
公其是乎不然何實暴如風振濟葉戴君若鼇冠靈山
橫流之中一匡而定公諱晟字良器其先隴西人也後
徙京兆曾祖嵩皇岷州刺史贈澤州刺史祖思恭皇兆
州刺史贈幽州大都督考欽皇左金吾衛大將軍隴右
節度經略副使贈太子太保代有名跡雄于西土公幼
好學學不為人及讀呂張孫吳之書慨然有經邦濟物

之志未弱冠游秦梁間元侯宿將見者咸器異之乾元
初嘗客武都值首豪以缺守搆亂殺掠平人公與所從
十數馳而射之殪其為魁者餘黨遂遯寇所虜獲積如
丘山公一無所取惟椎牛醕酒享士而去邦人感服具
以狀聞特拜左清道率飾以金紫將朝京師自獻方略
屬裔夷中擾有土急賢河隴將帥相繼表用歷二府右
職所至常以缺謀為其委重缺累遷至光祿太常卿階
爵在第一品缺涇原四鎮北庭節度都知兵馬使四面

都遊奕使懸識敵態周知地形應變不窮有奪有待缺
驥驟庭而莫展雲出岫而斯飛代宗徵之以左金吾衛
將軍為神策軍兵馬使屬羌蠻犯蜀朝廷濟師命公督
其旅絕棧道而往救馬公銜枚過險出賊不意連下堅
壁遂誅首惡還授檢校太子賓客且復舊職建中二年
田悅以魏叛德宗極意致討悉起徂征以公為神策先
鋒都知兵馬使加御史中丞與河東河南等道諸軍合
擊公濟河而行能以衆整及破洹水陣解臨洛圍轢魏

屬城抵照通邑其推鋒鋌銳皆先羣帥而寘力焉遙拜
左散騎常侍兼御史大夫厥功未成聞賊泚肆虐逆皇居
失守西嚮慟哭載馳載驅行及北伐授檢校工部尚書
充神策行營節度公提孤軍募散卒拊循訓勵以達行
在值懷光中叛大駕再遷加檢校右僕射餘如故尋轉
左僕射同平章事兼京兆尹神策軍京畿鄜坊節度觀
察等使管内及商華等州副元帥公固守渭城決平察
壘調食制用先發我師指甘攻苦皆自我始每一言一

誓聲淚俱發勇夫義士感而使之蔑不濟矣時自雍而東延于汝洛震于河汴所在征鎮亂略相從公介巨缺之間使聲援斷絕立成師缺法號令肅嚴蒐補十旬指揮一舉乘墉豁如通道誓梟獍以清缺宮而九市三條無輟肆之驚無秋毫之犯羽書速告鑾輅爰歸廓氛侵為祥歲攄憂情為喜氣詩曰允矣君子展也大成斯之謂矣考古視今論功稱忠者多矣若至危而安至難而易卓犖跨邁如公莫儔拜司徒魚中書令俄以凶孽

甫寧邊帥猶警岐下任重乃以本官兼鳳翔尹鳳翔隴
右節度觀察等使及四鎮北庭涇原等州副元帥改封
西平郡王加食實封至一千五百戶公名懾戎主政和
藩帥始至而生執少安而訓齊逮四載賦輿十倍其初
會課入輔拜太尉中樞如故人或謂公勲望已高寵渥
已極宜從容頤養稍稍遜避公曰不然人臣外則盡力
內則盡心若止偷榮孰為且哲故每承帷幄之間則言
弗無隱理奪不回大指以東夏可平西陲可復或已行

而事終不顯或未用而身遽不遺以貞元九年八月四日薨于位春秋六十七德宗撫几哭於別次自都邑達門畿無士庶無老幼皆發哀相弔則曩時戢兵安人之德可謂深於元元之骨髓矣冊贈太師法賻加等以其年十二月十六日葬于高陵縣奉正原鄭國夫人杜氏祔焉自捐寢至安宅皆所司辦護中貴反覆萬情所奉如不及焉嗚呼以公之靖難扶傾不言所利雖存歿極位始終殊禮而天意若曰其福享未至故迤延于後有

子曰愿故檢校司空河中節度等使贈司徒五列雄鎮
三為上公曰聰故光祿寺主簿曰總故太子中允贈兵
部郎中曰懸左神武大將軍兼御史大夫曰憑故右威
衛大將軍兼御史中丞贈洪州都督曰恕故光祿卿贈
右散騎常侍曰憲檢校左散騎常侍嶺南節度觀察
等使進因貴胄達以善政曰愬故檢校左僕射同平章
事贈太尉克廣前修仍執醜類曰懿故渭南縣尉曰聰
檢校司徒義成軍節度觀察等使統戎按俗是以似之

曰恭右羽林將軍曰愬嵐州刺史缺並地勢吏用兼而有馬粵太和元年秋七月聽拜疏上言以公之徽烈則御製披文於渭川矣公之風度則詔命圖形於靈臺矣惟大其丘隴鬱彼松楸望有祁山之象拜無岷首之碑將刊貞石式表幽隧乃命臣度稱伐言時其詞曰

建中季年大盜忽馬皇輿避狄狩于梁州顧謂太師汝才汝略將威致討必珍寇虐太師泣奉捐軀誓衆度其成城可以利用赫矣鋪敦傳于牆垣手搏足跡如衝如

援一鼓而破一麾而奔掃清宮闈刷盪妖昏我師莅止
我令行矣都人不知已事方喜飛章告慶飾駕言旋鴻
烈曜古謹聲動天車服之錫河山之誓九命而俯一心
若厲俾侯于岐阜安遑陟藩政既成袞職攸宜嶽降帝
賚矢言詭辭我后嘉猷我躬何為道直氣和勞謙終吉
福履所綏未享萬一上天不惠厚宥遄歸垂裕流光用
延恩輝翼子肥家將壇台席繼立竒功代傳休績聽與
伯仲永懷高蹤請于朝廷表是丘封帝曰孝哉胡可不

從宣我祖之丕業翳爾父之嘉庸乃詔作銘以觀德齡

太和三年歲次己酉四月庚戌朔六日乙卯建

隋左屯衛大將軍左光祿大夫姚恭公墓誌銘

并序

缺四字

諱辨字思辯武威人也導清源於媯汭肇崇

構於軒丘世

缺

斯缺五世祖泓為晉所滅子孫播越

居於武威曾祖讚撫軍將軍武威太守並以碩量

偉才佐時匡國父竇散騎常侍

缺

山川降神象緯幼

而風韻開爽志節通亮弓殫百步之奇劍

缺

氣馳名遂

以材官入選周保定四年起家宗侍下士天和二年

缺

虧勝羣帥見囚公頻進奇謀竟弗能用乃以舟師先

濟朝廷

缺

統營校公撫養士卒勸課農桑莫不家實食

廩人知禮節

缺

賞五年從周武帝平定晉州摧殄高壁

十二月進屠并州既

缺

公獨為後距轉戰不哀皇輿獲

安公之力也頻蒙優賞以累

缺

六年從定相州以前後

功授大都督封安養縣開國子邑四

缺

檢校武侯兵事

又命公隨桂國

缺

拔崇於武陟合戰又於野馬

缺

相濟

賈繁有徒公建旆邁征攝弓言邁摧鋒接戰允著奇功

大象

缺

戶開皇元年授上開府儀同三司進爵為公增

邑為一千戶

缺

所屆即事戎車公誠勇奮發義同閭外

屢出奇兵頻摧醜虜

缺

天府凡厥賞賜散之士卒二年

匈奴復入涼州詔以公為行軍

缺

前後衝擊晝夜攻圍

校尉之井既枯將軍之泉又竭空有思梅之

缺

以亡為

存策勲命賞理在不次五年授右武侯驃騎將軍霍去

病

缺

蔑如也六年授雲州道水軍總管戈船掩渚巨艦

浮川河溪肅

缺

匪曰崇墉棊峙聳堞相望邊柝不驚控

弦遠逝其年授使持節河

缺

化若神明十年檢校疊州

總管河州刺史行疊州刺史事公才略

缺

弘政教安民

和衆於是乎在十二年轉授左武侯將軍尋為涼州

缺

邊烽寢候毳幕旃裘望風斂迹十六年使持節靈州總

管諸軍使

缺

俗易風移政成期月十八年授原州道

行軍總管十九年授環州道

缺

總管公屢總戎律特精

邊事每秋風起塞邊騎揚塵折衝之任非公莫可

缺

年授左武侯大將軍進爵蔡陽郡開國公食邑一千五

百戶大啟

缺

皇丘欽明御籙睿聖纂圖特荷天眷恩遇

隆重密勿禁衝知無不為

缺

威等同進位大將軍左武

侯大將軍如故三年以母憂去官其年有

缺

自天幾於

毀滅僂俛王事杖而後起四年以官方草創授金紫光

祿大夫

缺

大將軍如故車駕北巡諸蕃朝朔以舊典

糾察整肅軍容乃令公

缺

旌門洞張內外肅然事嚴細

柳吐谷渾大保五期尼樂周等率衆歸附

缺

鑾蹕西幸

底定渾國乃以公為鬱卑道將軍旗鼓所振莫不摧殄
俘缺右光祿大夫左屯衛大將軍如故乃獻凱廟庭禮
崇備物六軍之長缺車駕南巡江都以公京師留守職
居爪牙任惟心膂出處崇重朝野榮之大業七年三月
遺疾十九日薨于京兆郡春秋六十有六惟公體量宏
達缺興義造次弗違虛已推賢始終同致加以雄圖恢
廓奇略弘遠氣有餘勇莫之與抗善於御撫得士卒之
心長於政術致庶平之美自入統禁旅出缺所夙夜匪

懈簡在帝心至於敬友穆親輕財貴義家稟誠孝奉以

周旋訓

缺

以善遽此歸全知與不知莫不流涕粵以其

年十月癸丑朔二十一日

缺

有詔故左屯衛大將軍右

光祿大夫姚思辯性理和謹秉心恭慎歷任

缺

式表哀

榮可贈左光祿大夫又蒙賜物八百段粟麥一千石謚

曰恭公

缺

祀

缺

長瀾若水遠馥薰風時賢繼及世德斯隆勤王成

務啟禩垂功炳靈不已

缺

冥照落雁窮能通援盡妙蹶

張選勇期門待詔職分七萃官聯五營缺陪衛出擁高

旌汎水兵略常山陣勢卓犖明謀沈深節制功有必取

筭無遺計缺恩寵顯赫身名執恭履順守滿持盈方陪

紀岳邊掩佳城遊魂不歸逝川缺春秋遞代徽猷永遠

右隋左屯衛大將軍姚辯墓誌銘虞世基撰歐

陽詢正書

唐茅山玄靜先生廣陵李君碑銘

并序

金紫光祿大夫行湖州刺史上柱國魯郡開國公顏

真卿撰并書

先生姓李氏諱含光廣陵江都人本姓弘以孝敬皇帝
廟諱改焉二十一代祖宏江夏太守避王莽徙居晉陵
遂為郡人高祖文嶷陳桂陽王國侍郎曾祖榮皇朝雷
州司馬祖師龕隱居以求其志徙于江都父孝感博學
好古雅修彭聃之道與天台司馬練師子微為方外之
交尤以篤慎著于鄉里考行議謚曰正隱先生母琅邪
王氏賢明有德行先生孩提則有殊異晬日獨取孝經

如捧讀焉羈州好靜處誦習墳典年十八志求道妙遂
師事同邑李先生遊藝數年神龍初以清行度為道士
居龍興觀尤精老莊周易之深趣執喪過哀口不嘗甘
旨之味食唯穠麥而已封植膳羞皆經其手號毀骨立
親族莫不傷之開元十七年從司馬練師於玉屋山傳
授大法靈文金記一覽無遺綜核古今該明真旨玄宗
知先生偏得子微之道乃詔先生居玉屋山陽臺觀以
繼之歲餘請居茅山纂修經法頻徵皆謝病不出天寶

四載冬乃命中官齋醮書徵之既至延入禁中每欲諮
稟必先齋沐他日請傳道法先生辭以足疾不任科儀
者數焉玄宗知不可而止先生嘗以茅山靈跡翦馬將
陞真經祕籙亦多散落請歸修葺乃特詔於楊許舊居
紫陽以宅之仍賜絹二百足法衣兩副香爐一具御製
詩及序以餞之又禁於山側採捕漁獵食葷血者不得
輒入公私祈禱咸絕牲牢先生以六載秋到山是歲詔
書三至渥澤頻繁輝映山谷初山中有上清真人許真

史楊君陶隱居自寫經法歷代傳寶時遭喪亂散逸無遺先生奉詔搜求悉備其跡而進上之先時玄宗將求大法請先生為師先生竟執謙冲辭疾而退缺七載春玄宗又欲受三洞真經以其年之春三月中書齋置書云其月十八日尅授經誥是日於大同殿潔修其事遂遥請先生為玄師并賜衣一襲以申師資之禮因以玄靖為先生之嘉號焉仍詔刻石於華陽洞宮以志之是歲夏五月隱居先生合丹之所有芝草八十一莖散生

於松柏之間詔俾先生於中官啟告靈仙緘封表進夏
又詔以紫陽觀側近二百戶太平崇元兩觀各一百戶
並蠲其官徭以供香火秋七月又徵先生既至請居道
觀以養疾九載春辭歸舊山其年夏六月前生靈芝之
所又產三百餘莖煌煌秀異人所莫覩先生又圖而奏
之是歲冬又徵先生於紫庭別院館之十載秋先生又
懇詞告老御製序詩以餞之十有一載先生奉詔興門
人韋景昭等於紫陽之東鬱岡山別建齋院立心誠肅

是夜仙壇林間遍生甘露因以上聞特詔嘉異初隱居
先生以三洞真法傳昇玄先生昇玄付體玄先生體玄
付正一先生正一付先生自先生距於隱居凡五葉矣
皆總集妙門大正真法所以茅山為天下道學之所宗
矣於戲是非可齊也物我均焉生死可忘也覺夢同焉
如此者何域心於變化之際哉先生以大歷己酉歲冬
十一月十有四日遁化於茅山紫陽之別院春秋八十
有七其年十二月八日門人赴喪而至者凡數千人號


奉冠舄遷寔于雷平山之西陲遺命以松棺竹杖木几
水瓶香奩香爐置於藏內門弟子等仰奉嘉猷克遵儉
德先生識思真淳業行高古道窮情性之本學冠天人
之際所以優游句曲鬱為王者之師出入朝廷特寵肩
輿之貴是知順風而問昔稱於黃帝望山而請今見於
玄宗矣又博覽羣言長於著撰嘗以本草之書精明藥
物事關性命難用因循著音義兩卷又以老莊周易為
潔淨之書著學記義略各三篇內學記二篇以續仙家

之遺事皆名實無違詞旨該博初先生幼年頗工篆籀而隸書尤妙客或賞之云賢於其父因投筆不書玄宗詔山人王旼強請先生楷書上經一十三紙以補楊許之闕先生能於陰陽數術之道而不以藝業為能極於轉煉服食之事而不以壽養為極但冥懷素朴妙味玄津非夫博大之至人孰能盡於此真卿乾元二年以昇州刺史充浙江西節度欽承至德結慕玄微遂專使致書於茅山以抒誠懇先生特令韋鍊師景昭復書於真

卿恩眷綢繆足勵超然之志然宗師可仰望紫府而非
遙王事不遑寄白雲而悠遠泊大厯六年真卿罷刺臨
川旋舟建鄴將宅心小嶺長庇高蹤而轉刺吳興事乖
夙願徘徊郡邑空懷存道之心瞻望林巒永負借山之
記而景昭泊郭閔等以先生茂烈芳猷願銘金石乃邀
道士劉明素求託斯文真卿與先生門人中林子殷淑
遺名子韋渠年嘗接采真之遊緒聞含一之德敢強名
於巷黨曷足辯於鴻蒙其詞曰

抱一混茫人之紀綱先生以之氣王神強乃啟玄旨玄
門以彰乃為帝師帝道惟康甘露呈瑞靈芝効祥上士
云感高風再揚鶴返仙廟雲辭帝鄉退歸而老妙識行
藏德本無累道心有常實曰形解孰云坐忘伐石表墓
勒銘傳芳谷變陵遷厥跡彌光

大歷十二年夏五月建渤海吳崇休鵠



六藝之一錄卷一百十八